

鹿
裘
石
室
集

鹿裘石室集卷第三

宣城梅鼎祚禹金著

詩

五言古

五君詠

有序

是五君者博雅不羣一時快士歲舍丙丁先
後來郡中余竝得托燕好龍君揚書來頗示
舊游之感迺循古五君詠目而暢厥指義庶
幾來曆亦有以論世焉爾

巴郡蹇平陽達

晉陽神明胄束髮游藻翰寸管鬱精靈五車多
總貫豹文隱霧成蛾眉煥春粲邈如始一麾遂
登循吏傳

西昌龍郡丞宗武

君揚卓犖人遵時安磬折游刃目無全攄藻見
餘力賓至各如歸推襟若有獲凌厲百代間日
晏從酒德

會稽史司理元熙

史侯負遐矚盼睽有餘姿在物何必廣總轡萬
事宜靈祕發宛委金簡授玄夷從政旣已達亦
復文在茲

荊州姜戶部奇方

姜令薄宦情所善惟名理沈跡簿領間汎觀五
湖裏習坎有歸流惠物若在已軀短智頗長吾
以擬晏子

臨川湯孝廉顯祖

義少我輩人狂鮮與世偶博文筭在腹任達柳

生肘游泳極高深陵壑爲牝牡所取良已多罰
之不能酒

贈沈子懋學

昭質何嬋媛流俗難爲好驅車萬里塗頓轡在
中道游雲蕩白日涼風委蔓草松柏有本性歲
寒以自保

其二

精衛銜木石窮年東海濱兩手能幾何捧土塞
孟津情知無益事寸心各有因悠悠誓來旋攜

手在中林

答從叔箕

有序

戊寅冬十月余方居廬感世人貴生賤死逝者不作而存者不能待逝也叔箕時時來相慰藉每憤憤于斯夫有牝聚必有羽分此理自然亦復何異詩用以讎言而已

翩翩丹旆前迢迢離我宅豐肌就瘠土人生異金石妍蚩寄它人恩怨覆何擇世情惡衰賤况履亾者蹟集虛始成盈在終理亦薄榮落有自

然何以固疇昔

其二

長離本鳳雛羽毛具五色一朝鳳遙逝遺雛失
所集衆人怪此鳥紛來相彈弋高岡窅莫致椅
梧化荆棘鸞鷲自何來矯吭鳴鳳德耽耽翼其
雛爲力思不克願以銜靈文休明挺神物

贈陳御史希美

有序

丁戊之際太史沈子甫侍中請急還里陳子
坐臺考解御史爲它官此其故予不敢知予

既爲詩贈沈子於陳子亦有贈焉

恭承 帝嘉惠乃峩柱後冠神羊司觸邪羣鳥
集臺端盛名不可處直道終棄捐朝趨魏其側
暮出票騎前入則各自媚出則爭死權小臣腹
背羽媿彼六翮全爲義無自擇在事豈孫難効
命苟不渝保已終無詭法星雖已失紫微麗中
天

歲除贈叔箕

夜氣何憭栗朱燈戢其光浮雲結重陰陽鳥浩

南翔良時相會好攜手命清觴憂來故無端驪
至曷有常六龍轡以趣玉衡指東方河清不可
俟四顧徒徬皇巢許遺重寄稷契詠庶康爲志
貴所適彼已安得將箕山在舉足吾與子同行

贈兄武康

天目森以鬱苕雪匯通川武康互百里南陌阻
西阡叢枳非所棲何以下鷓鴣弛威戒束溼治
小崇烹鮮蘭芳寧久闕薪積難爲前豨膏脂棘
軸不能運方穿令德含好音民秉誰不然申茲

密親義躋躅復何言

首夏還田間作

首夏氣清淑駕言還我廬連嶺旣竚窳衆木亦
扶疎新阡稍用闢故泉聊爲疏日夕牛羊下煙
火接柴墟動息無兼累言宴恣所如東菑聚臺
笠胼胝與之俱力田苦卒歲誰謂倦荷鋤鼯飲
但滿腹鷓棲不待餘顧已實何有敢回長者車

南征

抱景傷跼躅寒暑忽再周大火謝朱光駕言遠

行游揚舲抗勁風川路良悠悠密親遞飲餞欲
發仍夷猶悲哉氣僚慄羈旅增繁憂行行一何
之雙闕鬱雲浮莊馘繡如錯俯帶滄江流輕劔
拂長纓高蓋翼華輶豈無二三子相以結綢繆
外獎非所欽中懷難與謀達人恢大觀游子戀
故丘

南都雜詩四首巳卯仲秋作

名都麗且康曠望何闐闐跂予秦淮際東南負
三山閣道闕廣袤雙闕直其間百常冠陰岑城

郭上參天良苦輸日中馳騁惟萬千疏轂相擊
軋吁氣成鬱盤探丸有餘捷跼屣亦復妍置酒
徵笙竽爲樂浩無端信茲王者居充牣首四藩
馳景願自愛白日沈心顏

其二

此中何鬱鬱羅列如浮雲華星儼脩蓋迴颺蕩
征輪被服芳以澤妖蠱爭自明連翩策高足要
路各有津衣褐懷明珠誰能剖其真荏苒歲方
晏棄置勿復陳轉蓬寧有托九衢生柴荆其雨

杲日出四節遞相因千古一如此何爲長苦辛

其三

羽族從橫飛淫淫逐罔羅羅者問爲誰實爲王
人家流覽旣以及所獲良已多黃鵠成羽翼矯
若披朝霞一舉遂千里翻飛天相摩矰繳不能
施羅當柰爾何

其四

冉冉孤生竹嶰谷何逶迤托根固其所俯臨千
仞谿流水相激薄悲風楚以淒彤雲封下條繁

霜塗上枝上枝巢翡翠下條棲長離萬籟從中
發傾耳獲所私大聲難爲工時俗諒寡諧伶倫
日以遠徙倚中心知

南中覽古十二首

秦淮水

東南天子氣咄哉何蔥蔥朱衣絕地脈淮流浩
無窮時清霸圖歇宮闕出雲中

新亭

五馬浮渡江一馬化爲龍神州盡陸沈新亭泣

唐詩石室集不卷三
秋風長江畫南北馬子莫隴啣

東山

謝公寄朝列志不忘東山賭墅豈矯情智定心
自閒古人稱有獲乃在謀野間

卞忠貞墓

江左尚清談臨危愛其生慷慨死綏下唯有卞
忠貞土中骨已朽過者獨霑纓

邀笛步

子野工奏笛平生任誕人三弄上車去安問主

與賓至今有遺響滄波日鱗鱗

鳳凰臺

遠遊忽成悵策馬臨高臺悲風千里至浮雲四面來鳳兮不可見梧竹生秋哀

青谿

繁霜侵曉幕白水近橋梁箜篌工引曲泠泠一何長烏飛天欲曙小姑居無郎

周顒草堂

北山有草堂猿鶴相爲盟主人行不歸移文空

復情遠志與小草一物成兩名

臺城

城上烏啞啞白馬壽陽來天子作纍臣臺殿生
蒿萊佛力悵何施昆明問劫灰

華林園

會心不必遠翛然臨水糜魚鳥來相親濠濮諒
在斯風流誠已矣滄桑有變移

臨春閣

璧月夜夜滿瓊樹朝朝新高閣對麗宇後庭光

照人千秋綺羅地日夕芳塵

落星岡

落星高不極青蓮達者流紫綺袞翩翩竟脫就
鑪頭睥睨一世間此意良悠悠

燕子磯觀江濤

尋雲躋危嶠藐盼據奇詭林壑收素華陰霞浮
清美江路西南來灑灑從茲始白雲屯峻嶒迅
風失涯涘天吳沒洪濤陽烏相依倚冉冉歸照
遲汨汨夕流駛幽隱未可原霍然予將起

侯家諸園

長安貴公子開軒臨清池阿閣隱脩芷藻秀紛
陸離清華覆累祀朱榮冠陰崖引流注瀛海爲
山幻蓬萊開術亦互屬戒塗迷故蹊花樹優容
光猿鳥驕相持萬象工變更春芳不待時葳蕤
禪灌莽天地聊斯須

金陵出江瞻矚成詠

揚舩出斯干布帆隨風翔嶮介抗九州水德寔
靈長厓隙爲泐滂素波湯湯駕軼凌岑丘滌

沆縈浮光沿流千里勢
水百尺彊心神旣娛
悅耳目亦發皇始信古人言江海百谷王

與龍河南

置酒高宴會念當與子辭絲竹慘不發滿堂有
餘悲浮雲騰南征初月拳素輝駟馬戀其羣顧
影驕且嘶人生各有爲離合各有時安得晨風
翰送子以翻飛

其二

送子何所適所適河之陽俯視濁水流仰盼孤

鴻翔鴻飛厲其羽河水何湯湯我欲往從之中
道苦無梁子當遠行遊余當反故鄉故鄉豈不
好念子行未央欲去以徘徊欲留復徬徨依依
岐路間擘衣心內傷

其三

奕奕二三子皆我平生親冠帶一何工雙闕出
浮雲甲第羅其間河漢緯以經四坐發高唱今
德妙同心同心臨當乖歷歷參與辰烏生尾巽
逋雌雄意不申挈瓶適口淄澠誰見明千秋

此嘉遇知者常苦辛

其四

情知懷往路行道何遲遲
素質易以淄盛年難
久持灼灼天上雲沈沈
濁水泥攀援兩不及何
由邁佳期諒君存古驩
一顧不復疑白日回景
光幸察此中懷

寒夜讀盧栴蠓蠓集

披牘慘無驩臨風狂欲叫
歲晏海水枯夜闌鄰
魅嘯落落窮巷士泠然
金石調拍肩揚馬場引

手虹蜺釣迂世作羈囚遺音薦清廟飛霜脫南
冠浮雲阻西笑鬼神瞰高明日月失幽照贖父
鮮緹縈承家絕嵇紹殘鬼倚空門餘齒供野燒
烏鳶一何親寒醬黯相弔白壁不可爲翻貽狂
者誚但存慨忼歌令人識燕趙

聞鬼

矐靈此西匿霜露淒以零寒氣時總至遙夜傷
營蒐衆籟納虛牝間者懷我音愴怵失所自四
顧天冥冥儵往涕若怒心來隱若矜擘躑將乍

舉啁哳或猝沈驚颺而地起列宿掩其精載之
紛滿車離合相依因大化自繚轉吹萬蕩無垠
幽篁終不見山阿若有人

庚辰二月免服感懷

緬余邁先難俛仰猶朝霜日車無淹晷是月貞
仲陽時制率已及改服從吉祥居處雖如故匱
然虛中堂備物妥遺靈鮪祭達馨香總帷條若
舉左右何洋洋亦知永幽隔尚冀復來翔裳衾
已非御而況撤不張逝者日以遠存者日以忘

殉歿良所懲孤生焉可詳縱留但須臾天地等
芒芒鳴琴庶自釋絃絕斷中腸

雜懷六首

有序

時在庚辛梅子有憂幽之疾不能顯白隱約
成文

龍角睠已旦星鳥貞良時三光亦浮繫焉得久
控持風水爲輪樞玄天經玉儀空虛密流徙自
然有成虧晝挈遞相矜媿媿安所歸八挺生亂
戎戎首職爲誰

其二

物興常于會至至各有宜女魃非北御應龍安
可爲炎德履羸閏重華嗣堯衰共工遇其敵一
怒絕地維

其三

日月互經緯王者秉德刑陽壯承其全借光爲
太陰赭衣豈無象涿鹿乃佳兵爲德苦不竟爲
刑苦不勝濛汜漸以匿冥冥趨夜行聖知實析
楊大盜起何人

其四

長虹貫白日壯士髮穿冠子胥齒屬鏤鼓氣揚
鴻川少女志填海愚公力移山幽微疇見測賤
庶亦有權積羽欲沈淵積憤欲傾天

其五

鳳兮何所求鷲鳥固不羣世路有善顏天道貴
浮沈耿介秉微躬媵修及前聞郁郁蕙爲纒纒
纒索胡繩中天麗高日朔風吹孤雲千古無時
謀九死乃余心

其六

鷓鴣雞厲其羽玄鳥歸故鄉日夕涼焱發大火戢
朱光陰氣馴以至草木率焜黃九六代爲窮龍
戰血從橫堅冰自有時聖人戒履霜

贈林元和以陽穀令遷職方

凜秋革炎節瑟瑟金風舒飄塵蕩激楚露華凝
玉除送我平生友四牡此馳驅

其二

馳驅亦何爲王事靡滯留白日麗中天可以鑒

阻脩顧茲冠蓋人共濟極方舟

其三

方舟此焉極易水淒以寒擊楫而揚舲遨遊雙
闕間肅肅荷荇風明月澄潺湲

其四

潺湲承流波淑景揚光輝荷生綠泉中碧葉鬱
成規彪炳陽穀水藻耀君王池

其五

君王御至德神武振八荒
豐圖厥有司之子慎

所將媿無鉛刀任與子俱翱翔

其六

翱翔安可期蟬媽終無極鵬鷄各有程不得顧
中臆唯彼棠樹陰庶以宴日夕

東溪陪詹尹祀王府君祠

有序

府君名嘉賓近代良吏其東溪石梁善建爲
多以遷去數載無祿宣城尹詹君廼卽其游
爲府君祠修祀事焉顧予小子亦在旅獻屬
有詩

百川東灌河象馬戒浮沈澤阻告司嶮大夫首
卜征水維念已緩其崖復善崩惟石彼洪梁誓
旅出中誠輸粟既如雨荷鍤亦成雲浮竈實由
幻舒虹宛若縈原騰俯錯繡輿騎紛來臨遂令
稽天勢坐見周道平徒者以歎息居者以謳吟
生則爲明牧歿則爲明神茂宰篤蘭好餘芬儼
在襟所芟期勿翦而況夙所營考貞肅禋祀練
日妥遺靈善犧潔在俎芭舞侑竽笙形往神不
俱廟貌著方今河潤尚九里令名安可湮敬爾

百執事千秋庶合并

答周文選國雍劉大理長欽

東方有巨魚鱗蟲自言尊揚鬢若山列鼓氣如
雷奔長驅數千里將圖徙南冥中更不克偕而
與鰕鮒鄰常懼集爲枯乘雲會何因賴子激斗
水濡沫以自寧雖復以自寧至性終難馴斗水
有時涸懷子多所親

古詩六首酬蜀郡張伯大御史

有序

古者士大夫相問遺類必稱詩概諸春秋如

親奉教而或士數奇窘躓志意約結亾以自
通顯而攄激越之辭微而寓諷婉之旨以感
切于上上之人伏軾而耳聆投箸而手受日
給不皇辟之飲食吭主傳腹主內有所以通
則悅澤矣輓近世列戟而居清蹕而出使下
之人覘其上如雷霆之不可親如鬼神之不
可測其有佗僚無聊憤恨不平之事上無繇
恢其耳目而下無繇托其胸腑怨豈在明癰
久必潰則言之不容以已也如此 明興至

嘉隆之際獎進儒術布衣韋帶抗禮王公蓋
猶有古之風焉其弊也深文狙喜陽爲名高
而陰藏市道又何可勝原哉此其過非在上
之人明矣鼎祚一介之士也辱在侍御張君
之部下張君嘗行部敝邑鼎祚在諸生中卽
望見君顏色然未敢以身薦君而君采其虛
聲謂鼎祚略知古文字不競趨儼然以手敕
開之寵借訓厲辭致溫篤若已奉劔履之驩
叅肺附之戚而鼎祚實無此于君也質戇材

驚無足報塞俯循古人之義
陳詩六章非以希調而繆恭以庶夫申其景行其約結有所通而已諺曰犀象無位出自驕貴鼎祚有媿于其言

地紀展岷山星經直井絡物力亦何豐
人文洵於曠張公王佐材朗鑒徹冥漠千載不爲難
所志在寥廓

其二

寥廓游無窮勃窣工名理
皇風穆且清賢喆乘

時起舊京存紀綱 聖祖培豐芑龍虎奮騰騫
大江流瀾瀾

其三

江流導汶峨雙闕緯以經柱後冠嵬嵬埋輪在
都亭代天司肅殺鷹隼搏秋冥一擊無凡鳥爪
距何從橫

其四

從橫出微言在昔稱柱下幽玄緬猶龍堅白邈
非馬摛辭轉彈丸霏譚炙轂輅詎意清朝彥顧

盼在中野

其五

中野涼風發猗蘭戢其芳含情卽蔓草况復繼
嚴霜幸茲勤采折懷袖置不忘一當君子御遂
爲大國香

其六

大國構良材梁棟曼且碩樽櫨誠細微左右輔
王室繩墨出工倅安能同棄擲明堂鬱雲興鄧
林無遺植

江上宿觀音巖

江眺極蒼茫，雲居信縹緲。日沒衆巖空，天長片帆杳。靜夜縕霜嚴，澄波銜月小。鳴榔跳潛魚，危巢跼棲鳥。濤響雜寒松，露華流翠篠。一燈照世迷，孤磬出林杪。獨宿抱疎星，高歌命嘉醪。清徹不成眠，海曙映秋曉。

卒歲

卒歲一相勞，晏笑乘良時。采采園中葵，聊用充豆卮。小婦解秦聲，朱絃含素詞。耳熱倚天嘯，天

風來何悲矯首盼明河精光宛其垂列宿復皎
皎三五以參差壁鐙坐相擁還省夜何其大藥
儻可就紅顏庶自持努力且爲樂嘉會無常期

飲酒

玄指世罕銜素心吾具得高齋頰川坻薄業托
漁弋匪絕神駿招自謝人龍德機鏡萬籟虛天
放羣動息尊生術且饒會境疇能測蘭膏燧未
央一觴爲申臆

夜憶

夜靜得溪聲春陰搖雪色一水自盈盈孤燈空
嘿嘿端居有所思遙天望不極

還山居命酌酒盡酸時甫叔月下見過云

家釀復爾戲占酒字

恥成醉士名聊復寄情酒縱飲苦無多一呼堪
十斗咄嗟張廣筵招搖環密友妍辭吐丹唇繁
絃揮素手味好斂金莖色豔妒春柳主獻客亦
酬長跼互爲壽薄旋故山居新綠盈南畝嵐氣
夕侵衣泉聲涼入牖言念市中酌命發牀頭甌

已覺動歡顏乍恐不甘口初吸漸縮舌再吸欲
搔首三吸覆杯笑四吸循牆走醯雞將爾同泛
蟻於何有長鬚自听然歸而詈其婦孤坐羣星
移遙聞剝啄叩披襟問子誰余叔立門右夜午
月華生濁醪君得否叔視予微嘻濁醪藏之久
初吸及四吸擁鼻竟如某雅意非獨醒胡云遭
勿偶厨人語依稀理秫付石曰涎垂在曰前眼
穿在曰後大隱不離城還當居二酉

二酉市中居名

谿上贈外兄郭汝堅

有客云不速良會當在斯託契爲兄弟握手顧
其私烹鮮命中厨濁醪歡自持秋色蒼然來庭
芳白露滋返照翳深巷牛羊下何遲食力小人
分古道具茅茨披髮狂擊缶烏烏吟聲悲醉後
出真態君子無見嗤

張大來贈琴溪藥魚

杖策琴溪遊馮高求其侶冥心未劫前精靈颯
相語百里緘素辭開函疑對汝大藥化小鱗好
事以登俎佳氣蕩羶腥玄味瀹心髓頑骨非僊

才媿彼吐腸鼠乘鯉豈易能遙遙良會阻白雲
衣天南中流有蒼嶼

送姜令

送子上河梁飛蓋翩翩揚征馬嘶北風長途天
兩霜當歌意不憚杯行亂無行我生乏羽翼焉
得乘雲翔昔爲箴與塤今爲參與商

其二

參商永相望良會亮有時畏此簡書嚴安能緩
斯須雙鳧凌太清雙闕何逶迤受計坐明堂鳴

珂集玉墀鳳皇苞九采高岡振羽儀

其三

羽儀迺有托駢服良難并美人不下堂中夜聞
鳴琴蕭艾化爲荃桃李植成林天高澤易溥靈
雨潤八垠茫茫觀元化喟焉傷吾生

湛玉亭集作

颯颯霜風吹繫馬門前柳主人敬愛客雙魚佐
斗酒松老結爲樊水落低懸留七十二鴛鴦一
一在中藪殘日澹孤亭寒星挂高牖綵筆健秋

鷹浮雲變蒼狗但取百壺驪底用千金壽雖疎
趙女瑟且擊秦人缶醉鄉豈謂遙世事於何有
栩栩與天游兀兀喪吾偶

雜詩四章

玄景何易匿冉冉青陽馳庭前有嘉樹率已媚
華姿悠然念茲會中懷淒以迷夙昔秉遐矚動
與千秋期斂袂事姱脩結髮守屏帷燕金如俛
仰隋珠詫陸離雲浮西北樓日出東南隅坐着
路傍子翱翔盛明時宣尼從所好榮名徒爾爲

其二

鴻響一以瘖此物自誰得嗷嗷競淫恣嘖嘖矜
顏色睠彼濟南生操觚稟詒則萬仞仰止懷百
折砥柱力大道故不容至心安所測伊余負玄
想二化相終極雕龍承履綦舞象攻繡織振衣
期獨往築室疑衢側握璧謝荆材韞燕憇周識
殷念如之何勗哉奉令德

其三

鳳皇翔千仞不羣梟獍譁黃鵠舉四海不受矰

繳加高岡植梧桐玄溟出雲霞俛首人間世
纒然鮒與鰕

其四

把袂向君問今君欲何之朝游丹山傍莫宿赤
水湄丹山枕赤水中有碧玉枝玉枝奉君食駐
君青雲姿左手握萬象右手懸兩儀紫煙冒玄
圃閔風披瑤池僊人王子喬壽命與等期遂令
後代士長歌遊仙詩

出郭

余本山中人偶來城裏住出郭愛看山坐失家
何處山亦解憐余相看渾如故卻笑城裏賓不
及山中樹

古意奉酬銅梁張中丞四明向侍御

孤桐何矯矯粵在龍門陽青雲鬱其上赤水經
其傍靈鳳朝至止游鵠暮相羊殖根旣已異取
材亦維良伯子工引曲鴻響于焉揚一彈含白
雪載彈中清商峩峩高不極湯湯殊未央此調
響沈邈傾耳誰復長張樂洞庭野鱗翼相與藏

迺知稱古道必遺世始臧所以絕絃者千載垂
芬芳有懷慊以慨三復南薰章

鹿裘石室集卷第三終

鹿裘石室集卷第四

宣城梅鼎祚禹金著

詩

五言古

贈沈比部箕仲

時以論
囚來南

澄瀛舒翔陽赤堇鬱金精萬族此已合亦復挺
時英維時子特達矯跡升青雲一佐爽鳩氏厥
職司詳刑

其二

秋霜悴百草天地肅餘威威德兩不任時至有
必歸緬思下車泣黃虞日以非萬方咸在宥天
澤會隆施刑家雖尚斷惟卹猶所宜冀子歛玉
律寒谷生葳蕤

其三

簿牒何糾紛決之不崇朝善刀無遺理良非中
所操竊按顧有獲爲名寔已邵往往捐耳目千
古何必遙精言致在賞應契神必超

其四

予少秉機杼徒倚不成章天孫有餘巧經緯煥
七襄中夜遡明河河廣一以長何意此嘉遇白
日垂景光精氣竟有合千載永相望

哭麻鴻臚

驚風下平楚白日歸虞淵彼此相代謝時至有
固然所以上知士往往不待年比歲在龍蛇汝
命竟不延汝髮始見艾汝子甫及肩汝婦爲予
姊一旦哭所天冠纓雖被汝汝味寄考槃淄澠
中具別瑕瑜口不宣餘財亦務分愛客羅長筵

荒宴終日夕托酒以自全詎意黃公壚儻忽成
河山逝水豈顧反行雲何當還流塵暗虛榻徑
草復夤緣形神曠不接而况尋笑言先後等斯
須嚼焉摧心肝

歲除二首

噉噉園中禽纖纖原上艸感彼玄運徂睠茲青
陽好志士苦惜時喆人慕聞道仰瞻浮雲馳俯
盼流波渺心短髮日長踟躕憂以悄自非金石
軀安得不速老

其二

老亦不足憂少亦詎足喜兩儀式迭居二陸戒
循軌所貴金與石至德云不毀鴻眇萬故殊庠
亢一以止千秋達者儔逍遙寓玄指

贈郡太守襄陽鄭公上蜀憲十首

有序

襄陽鄭公之爲郡五載也端靖廉明直諒慈
惠衆美畢具六事咸修今年夏天子采部
使者薦言擢公按察司副使備兵川中川故
國家西南境表裏荆湘襟帶關隴氏羌猺獠

雜種錯居屬者以要荒遠服期必得人廼有
茲命屈行郡搢紳大夫三老百姓圖請畱不
獲遂相與扶掖提攜饋漿卧轍至踵屬于郊
關鄭公嘗以詩起家于是博士弟子鼎祚祖
以詩鼎祚雖籍博士乎其治古常什九旣無
當作者之林而懼行或不軌于正鄭公時時
心警之于鼎祚禮有加夫讎言者務達其衷
報德者貴居其實鼎祚身貧賤無以顯義于
鄭公然而知我與生我等也其義在卒章矣

帝代遘休明荆楚挺寶藏光耀十五城薦之圭
與璋未照一何廣還顧江之陽

其二

江流旣宛澶敬亭鬱崔嵬高深一以極結構紛
離哉掩閣托卧理烹鮮有餘材

其三

餘材豐暇豫屬意希廣平翰墨時間作色笑載
青衿自顧濁水泥何以挹清塵

其四

清塵豈不遠會與飄風偕悠悠陟荒塗無言目
成蹊中懷各縉綬千秋以爲期

其五

嘉期故難常僕夫效前驅 皇眷迺西顧夙夜
畏簡書逝將去舊疆鳴劔撫邊隅

其六

邊隅眇何所古服稱要荒漢惠洵廣大顧瞻若
堂皇願假西南翼萬里相翱翔

其七

西南驚江路徂兩改中達微陽霽廣甸桑柘藹
餘暉扶攜擁道周躑躅將安之

其八

居者爲躑躅行者爲逡巡誠知異駢服念此平
生親冀言解饑渴息彼棠樹陰

其九

息陰期嘉木翦伐諒不然翩翩者黃鵠日夕巢
其顛欲奮無六翮偃仰以自全

其十

仙舟不復集 卷四
三
偃仰恣天游安能事攀援
後期儻克諧微尚庶
由宣曷以酬明德厚終矢勿諼

司理黃公有發應

召北上

有序

黃公上善若水厚惠載坤懸刑不試望肺石
而輸情博古能施闡心謨以示訓闔境咸皈
有造鄰封自謂無冤亦且不處其名鮮求速
化可謂治而不治者矣 天子營公政狀以
尺一 召公公行矣鼎祚自計陳人無當貴
達斷足府寺偃卧林園嘗辱公采其虛聲隆

之賓禮近者授玄艸于子雲傳祕圖于副墨
良朋不乏知己誠難詩不云乎無言不酬無
惠不報酬言之指具在斯文報惠未皇埃諸
它日

明德終見貺神物久必騰龍劍挺閩天飛止吳
江濱一割有餘銛五步不畱行族會旣已理善
刀入無形豈虞闕折故無乃盡其情閔然中自
卹惟刑猶所欽

其二

日者理予郡星紀三忽用爲政者畫一十一
史侯規隨儼遺則諧遘實好仇冲明咸在襟恬
穆子復優遂令百代下俗與羲黃游長策一以
振天路雙華輶

其三

天路屬清夷皇風闢四門弓旌徧巖穴而況振
時英紫微麗玄霄列宿翼其尊危言贊國是千
鈞等一身衿帶爲誰施貴在出中誠子其殉爾
志庶以報高深

其四

粵予本弱植空谷疇見依含章不自固構子揚
其輝雖乖雲雨會取媚在庭階子懷多婉戀予
中實與諧遠致旣何因復恐嚴霜催天惠無頗
施寧獨捐細微微情待深澤厚終以爲期

贈詹令君應 召

有序

詹公挹敬亭之羣潤帶宛句之雙清義重薪
樵治捐鞭策無金可卻猶壁在懷比者歲紀
卯辰水菑羨溢公發此已責薄賦輕徭尸罕

轉遷饑而不害至于六十下以適上不匄實
以賈名處宦如家七年一日足擊冲濬之局
益占遠迅之材矣今 天子徵部使者薦剡
召公列侍從之臣司繩糾之事行握大斗斟
酌四時薦陟泰階平停三象良何異焉予不
佞少圖經世長困違時發憤公庭時蒙采納
咨詢祕畫日獲叅聞蓋匪直傳琴酒之游締
文字之好而已公馬首北矣援思抽毫聊充
行李興言瞻袞尚企來蘇

明宰乘兩鳧翔集五湖汜五湖多輕心其人難
與理鳴琴不下堂清風振薄鄙天澤惠時芳化
彼藿與芑匪以吏術崇學道固君子

其二

爲邑未終星殷憂薦水溢晦首無餘糧公家有
宿責眎疚若嬰躬勞來在中澤天墜詎難周沃
壤豐黍稷玉燭美時蘇翼翼昭 帝德

其三

幽蘭芳空谷桃李自成蹊大義屬嘉招冠佩紛

陸離神光遵白日片言握璇璣萬有此斟酌玄
象眇曷窺何爲百里間私惠常自持

其四

余雖短世略少小懷國憂微願不克諧乃與竹
素遊惟君備朗鑒司契理獲投矯翼忽上升相
從邈何由撫劒發長嘯因風達神州

余母柯夫人哀詩

有引

觀察池陽余公其元妃曰柯夫人生長君曉
而夫人卽世武昌蓋是時余公理武昌也余

緣本安仁悼亡仲宣思親而追作哀詩次君
翹情篤友于戚同所出夫夫人卽世于楚而
楚人又善哀怨是宜長君習之也

浩浩沅湘波汨汨莽分流竚眙斯攬涕泉路阻
以幽姱節信自因鬼伯胡見求雖有婉孌佩憑
絕望靈修青春一受謝長夜卽悠悠

其二

蕙華昔曾敷繽紛彌都房霜露倏以至從風自
飛颺奇思鬱不通盛年損精光惟有猗靡情千

載遺其芳極目江水外紆軫心內傷

其三

端居具儀則髡彼事良人弓彊迺在弭雞鳴不
及晨中道忽若遺邁此生不辰楚些有餘哀大
招空復陳故者日以故新者日以新再命肅煌
煌千載垂堅珉

其四

啞啞城上烏一母將一雛綢繆撤桑土覆嫗猶
恐疎凌風無反顧所將不克俱旣已豐羽毛寧

不念厥初銜卹中自失殲血潛以噤一爲桓山
吟長懷楚水隅

感聞

孔子辭廩丘終不盜帶鉤許由讓天下終不利
王侯自古皆有歎我非獨見尤肝膽一相襲在
疎分必投况我密親友能不尚所由大義儻弗
訾何用懷心憂我聞小人言禦寒必重裘

其二

伐國問仁人斯言何以至本無嫌與疑不處非

我意豐田多瘠草我生故如寄在躬已不閱皇
卹它人事傾柯晞朝陽根株非有二我聞詩人
言誠富亦祗異

司文選萬玉山房詩

瀟湘多奇植結根荆之陽嫵媚襲空翠參差出
鳴璜端居有餘清闢徑各異行君其望三益予
庶求與羊

其二

濬冲何簡要處選無滯才把臂期入林偃仰恒

在懷杜蘅雖餘馥蘭芷亦易摧歲寒葆貞素茲
意良悠哉

其三

渭川等千畝淇園疏萬竿何如夾江水相與詠
檀欒巫雨紛斷續湘雲時鬱盤美人倘有贈持
此青琅玕

贈陳令公拜比部八章

有序

令公爲敝邑治行未可更僕數其最著而稱
鉅者則議賑貳撫流亡飭農務端士趨寬徭

薄賦潔已奉公凡六年于斯矣余小子屬公
門下親睹其建事竊有所臆于公陳公沈謀
有大度行安而節和如千頃之陂如萬仞之
嶽卽才有所不必藐威有所不必信名有所
不必取物有所不必隨如善刀者投之無間
入之無形善御者不失我之馳而亦不盡馬
之力蓋廩廩德禮君子乎抑社稷之器也
今上在宥天下庶職百司莫不簡脊以歲之
不時宵旰之慮猶重刑管夫古之刑者惡其

意非惡其人以安之而已非求以勝之且茲
畿甸要荒皆奉 上所指嚮而覘其舉厝爲
安危者也余郡諸邑吏先後遷去而陳公獨
遷刑曹在 上意可推也頃 詔遣近侍出
少府金錢三十萬段予貧民豈有所畏于橫
目而要結之安下厚宅固本寧邦亦有國之
紆籌爾皖潛之難已爲勤兵增城羽書復及
境上夫刑急則上下相蒙以必至于遁緩則
彼有可自寄而不至囂然喪其樂生之心語

曰法令滋章盜賊多有余故竊謂陳公是遷
也在公實非有不次然當事者所以爲寧固
安厚計良深矣令公謬目余國士數薦不達
而未嘗致私予予亦無敢私令公公旣遷而
邑縉紳大夫三老子弟相與遮留越數月始
發發之日或舉象而圖寫或連類而賦詠纍
纍纏纏錯繡貫珠頗極無前之盛余小子與
在祖道敬撰古詩八章而序其事如此司勳
氏姚江呂公文章妙一時其人長者先爲郡

李用刑平與令公同時固雅善余余其以遷
令公益徵呂公能持衡識治體也公時時過
天官署中琴酒間出予言質之余且來遊燕
市和而歌相樂焉

孟夏何滔滔涉江濤已壯北首遵 王畿迢遙
置天上宮觀緯且經冠蓋鬱相望就列各有陳
欽刑古所尚沴氣或干和愆陽薦成亢遺愛方
自今恭承 帝嘉貺

其二

遺愛今者誰維我宣令君才智絕殊衆明聽竦
若神操刃室餘銛恥以割自名烹鮮戒勿擾害
馬去其羣百里豈云廣蕩蕩茫無垠德音日彌
劭匪爲地所因

其三

昔歲貞大淵炎天溢橫潦肥蠹復見妖平疇鞠
茂草芟舍令在郊齋心事雲禱嘉澍豈不豐如
傷軫流殍翳桑若有援蒙袂代相保旣不弔旻
天焉知其所造

其四

皖瀟岨江介戎首劉與俞饑鴟靡反顧闕虎怒
負隅東征破戕斧荆棘生中衢震隣雖敝邑安
乃若覆盂遵渚有哀鴻適此樂土居輯難由撫
衆可爲吏者模

其五

五湖多傾心南風久不競逝以君人德而儷師
保任載色稱匪伊發蒙懲往吝華實亦兼資經
術紛難問標賞咸自矜引義獨歸正武城聞絃

歌清徽信可鏡

其六

迫檄戒徂兩縮轂不得翔瓠脯酒誠甘士女相
扶將一一前爲祖願公壽悅康小人固有心誰
謂舉國狂豈無來者親兩美懼不常旣畱但須
臾臨邁復徬徨

其七

情至戀彌殷而况夙所眷予懷鬱不宣何以致
縑縷繆許王霸略深衷托柔翰世乃有斯人局

促守貧賤俛思酬茲言將無白圭玷執義儻不
渝終爲悅者玩

其八

昭王臺中天突兀千黃金冀北無畱良天駟何
駢駢呂侯旣驤首陳侯且軼塵顧已乏高足曷
以據要津相期燕市中和歌游酒人歌聲多忼
慨感激爲知音

燕京感懷

纍然載牘至亦云與計偕
廷對修舊儀玉闕

隱瑤階 聖祖肇南服豐芑意獨培世異執偏
重甲第何恢恢每視此曹子輕忽如塵埃肉緩
骨不支進退誠怡駉驟耀善爲觀積漸洵有基
榮悴不自天時哉與推移

訓馮用韞宮諭

漢濱有游女交甫翔而遇懷佩空復情嫵婉非
我故朝雲何洋洋望遠美無度精神相依馮韞
邁于寐寤初思弗克當褰幃逝請御變幻實
須冥忽不知處

其二

楚璧未辭璞泣血代相明櫪卓伏騏驥翦拂遂
長鳴千里繇善馭一剖重連城物亦貴所托至
至各有因塗夷適窘步時清獨懷珍誰能識察
此含意前具陳

其三

泰岱宗四岳大海百谷王流壤誠細微高深証
有防儕衆躬益厚謙尊道迺康長風激弱羽頽
落固其常視疾若在已引譽戒不詳發我以沈

醴誘我以善方小人庶有心斯義矢中藏東壁
自餘照冀終垂末光

題程孟孺吉祥草花

綠葉何離離紫花何茸茸羅生在堂下雲霞相
鬱蔥衆枯乃得榮影氣多所馮忘憂言樹背宜
男言佩匈后皇慎徠服茲豈凡卉同字以妙吉
祥綏綏襲予躬

酬司業漢冲蕭師五首

南紀導江流滔滔爲漢廣洵美德肇周化行千

載上吾師植麻符雄風嗣清響遘會與雲興冥
神契霞賞一入承明庭高步振古遑

其二

庭中雙明月來自荆山陞珪璋雖異器各爲世
令儀惟公作多士民牧仲克司簫勺肅群慝吏
道亦可師昔聞楚人言所寶良在斯

其三

挺括始成材藍朱蘊爲采璧水實式臨青衿何
藹藹洪鐘有餘叩攻木堅可解衢樽置斟酌譬

彼江與海渴者自知足焉測其所宰

其四

高天豐廣澤於物無頗偏栽培亮獨至我迺承
其先噓枯欲作生扶膚立就堅超忽有變化薄
質曾弗遷願以葆貞固終已任自然

其五

環轅辭帝京北風嚴感栗信宿寄桑陰攀條且
褰卹而况列負墻有三事如一欲發難卽涂欲
留非我宅涓子去在今誰宣我心曲

贈別龍君善博士

昔君新都日爲理托稱詩臨雍攝半席多士儼
來斯一見符夙聞色笑有餘師君志在千里我
亦中有期安得蕭蕭羽相與從風馳

其二

沈酣日相徵埋照以自善道在杯酒間誰知非
荒晏我來燕市遊結裾爲婉變短酌引長謠深
衷從此見良時坐獨捐跼蹙守貧賤

其三

人生豈苦匏漂搖隨浮萍游子懷故鄉與君非
不親徒御聞將旋櫪馬歡且鳴我衣非有繡別
久歸亦榮積客戀故土中心復怍營還顧雙闕
間冠蓋何繽紛

答何稚孝比部

日進或不御聞聲乃遙思耳目互貴賤自古誠
歎咨君昨卧閩海末契寄諸詩今來燕市一中
見勿復疑精氣儻相授千里卽庭階玄珠歸象
罔道貴在希夷衿帶奉不傾寧志以待期驅車

遲明發願言惠前綬

虎丘臨劍池作

吳德肇讓王姬光乃健鬪美炙衷魚腸大文舒
龍繇技擊齊且摧餘皇楚兼覆恢張明得意臺
觀象天構二八相代射川陸罷奔輳未造詘雄
圖餘力燁身後銅棺周三重銀海匝曾甃衆劍
負靈威一一弢石竇金精直上騰白虎率仁獸
理化眇何倪曆運善遷貿星眉抗疏宮雲乳暗
縣雷仄壁蹠空冥陽鳥翼回晝澄溷滌神情幽

響荅梵呪水木光湛如霄嶺氣交就里俗好遊
邀舟艦向風逗袷服競春明繁弱承夕奏不醉
戒無歸探囊顧所授投珠移洛濱握草夢荆岫
初穎適標新陳柯俄改舊礪刃登高丘歌酒置
亭堠客行夏正中朱火貞炎候解衣爲盤礴凜
秋倏已邁斟酌百代間觸物在樊囿吾甚厭名
膾臨流清可漱

婁東謁元輔太原相公會方應 召北上

誦德陳懷恭贈十首

聖期邁嘉泰曜靈適中天濯翼因雲雨贊化須
尚賢王公興曠代儼爲百辟先疊疊運大象一
一無頗偏形崖雖外朗恬漠合自然衆庶循厥
緒至人閱其端

其二

端緒如轉環先幾鑒崇替聖善實膺懷明發詠
不寐使車來彭彭天語具溫麗援裾違我情
抗表拂臣義首路相扶將單舸遲宵濟周才不
蜀羣虛已以應世出入窈無垠家國各有際

其三

紫微正縣寓重明麗前星社稷至大計難以口
舌爭商山芝擘擘疾歌若不聞悟主由片言羽
翼率已成吾所不能致望隆聽乃傾沃心古明
訓昭格宐有神

其四

西旅旣不咸東夷亦倣擾舞皆出餘威 皇莽
振遐討陳義于止戈全國遵善道玄略韜握中
安儀示形好詰士戒外寧豫附當及早治內有

良符願公誦天保

其五

挈瓶但適口安能辨淄澠登艫望鳧鵠焉知浮
與沈衆美迺襲疾矯跡顧自營耳目詖馳鶩深
衷曷見明國是未能定朕師虞震驚握衡准中
則四時有紀經

其六

合奏非一弦高翔非獨翥雷同誠足卑孤貴罕
所附飲醇怡復閒伏茵醉蒙恕包荒用馮河不

吐亦不茹變化隨時宜神宇罔長馭

其七

執御氣不揚掃門路何階詎謂飄風會終與願
克偕墮地始燕中頗多烈士懷羈貫綜六籍文
史屬俳諧心知當世事口噤不能開鍵躍信緣
牡瓠落良非材旅進若鱗次一陟黃金臺

其八

駿馬箭雲征疲馬戀棧豆滅沒存亡間遺形與
精構顧謂千里姿宜置在天圉達術何廣廣不

得竟馳驟失道復南轅長策詘短袖

其九

謁公趨子舍起居脩太君鶴鳴在九臯同聲和
重陰廣坐設賓主燕衍樂我員德音固彌劭雅
樂復昭清緒風蕩闌暑衫絺中懷冰酒半耳相
屬致勤千載勛金匱有遺策庶以世紹明其人
諒非昔後命荷重申

其十

握髮與吐哺招徠亦勞止東閣淪馬廐茲意久

靡靡弓旌絕巖穴舍車多賁趾峻標貞玄同我
公度弘美豐林叢衆鳥澄淵集衆鮪賤子提空
名謬恩非望始惠澤垂高雲冀陰天下士

鹿裘石室集卷之四